

## 每週經課朗誦經文(巴克禮漢羅/教羅)2012/08/26

### 共同經課 - 1 列王記上八章一節、六節、十節～十一節、二十二節～三十節、四十一節～四十三節

1 Hit 時所羅門聚集以色列 ê 長老, kap ták 支派 ê 首領, 以及以色列人 hiah-ê 族長, 到耶路撒冷所羅門王 hia, beh 將耶和華 ê 約櫃, tūi 大衛城, 就是錫安, 運上來。6 祭司扛耶和華 ê 約櫃到伊 ê 所在, 入 hit 間厝 ê 後殿, 到至聖所, hē tī ki-lō 兵 ê 翼下。10 當祭司 tūi 聖所出來 ê 時, 有雲充滿耶和華 ê 殿; 11 致到祭司爲 tiōh 雲 ê 緣故 boē 能 khiā-teh 服事; 因爲耶和華 ê 榮光充滿耶和華 ê 殿。22 所羅門當以色列會眾 ê 面前, khiā tī 耶和華 ê 壇前, kiāh 起手 ng 天, 講, 23 耶和華以色列 ê 上帝 ah, tī 天頂, tī 地下, 無有上帝親像你守約行仁愛 tī 你 hiah-ê 奴僕, 就是盡心行 tī 你 ê 面前 ê。24 你 tūi 你 ê 奴僕我 ê 父大衛所應允 ê, 你有守伊; 你親嘴講 ê, 親手應驗伊, 照今 á 日 ê 款。25 耶和華以色列 ê 上帝 ah, 你所應允你 ê 奴僕我 ê 父大衛講, 你 ê kiān 孫若謹慎 in ê 所做, 行 tī 我 ê 面前, 親像你行 tī 我 ê 面前, 就屬 tī 你 ê beh tī 我 ê 面前坐以色列 ê 國位永無斷; ta<sup>n</sup> 求你應驗伊。26 以色列 ê 上帝 ah, 祢對你 ê 奴僕我 ê 父大衛所講 ê, 求你 hō 伊成做實事。27 上帝真正 beh khiā 起地上 mah? 看 ah, 天 kap chiah-ê 天 ê 天尚且無夠額 hō 你 khiā 起, 何況我所起 chit 間殿 ah? 28 耶和華我 ê 上帝 ah, 莫你 à<sup>n</sup> 落 siāu 念你 ê 奴僕 ê 祈禱懇求, 來聽你 ê 奴僕今 á 日所祈禱 tī 你面前 ê 求叫祈禱。29 莫你日暝看顧 chit-ê 殿, 就是你所講起我 ê 名 beh tī-hia ê 所在, 來聽。你 ê 奴僕所 beh ng chit 所在祈禱 ê 祈禱。30 你 ê 奴僕 kap 你 ê 百姓以色列 ng chit 所在祈禱 ê 時, 莫你聽 in ê 祈求; 莫你 tī 天裡, 你 khiā 起 ê 所在, 來聽 in; 你聽見 ê 時, 就赦免。41 論到外邦人, m̄ 是屬你 ê 百姓以色列, 伊爲 tiōh 你 ê 名 tūi 遠遠 ê 所在來 ê, 42(因爲 in 聽見你 ê 大名, 大權能 ê 手, 伸出 ê 手;) 若來 ng chit-ê 殿祈禱, 43 莫你 tī 天裡, 你 khiā 起 ê 所在, 來聽 in, 照外邦人一切所 tūi 你求 ê 來行; hō 天下 bān 百姓 lóng bat 你 ê 名, 敬畏你, 親像你 ê 百姓以色列一樣; koh hō in 知我所起 chit 間殿是用你 ê 名來稱 ê。

### 共同經課 - 2 詩篇八十四篇

1 Khó-láh ê 後裔 ê 詩; 交 hō 樂官; 用 Ka-ték ê 樂器。1) 萬軍 ê 耶和華 ah, 你 khiā 起 ê 所在, 怎樣 hiah thang 意愛。2 我 ê 心神戀慕耶和華 ê 殿院到暈去; 我 ê 心腸, 我 ê 肉體, ng 活 ê 上帝求叫。3 萬軍 ê 耶和華, 我 ê 王, 我 ê 上帝 ah, 雀鳥 á 爲 tiōh 家己 chhē-tiōh 一個厝, 燕 á 爲 tiōh 家己 chhē-tiōh pū-kiā<sup>n</sup> ê siū; 就是 tī 你 hiah-ê 祭壇 hia。4 Khiā 起 tī 你 ê 曆 ê, hit 號人有福氣; In beh 直直 o-ló 你。[Sè-láh]5 伊 ê 力在 tī 你, In ê 心意 ng 錫安 ê 大路 ê, hit 號人有福氣。6 In 經過 Lâu-目屎 ê 山谷, hō 伊變做水泉 ê 所在; Koh 有秋天 ê 雨 ê 福氣 kā 伊蓋滿。7 In ná 行, 氣力 ná 加添, Ták 人到錫安朝見上帝。8 萬軍 ê 上帝耶和華 ah, 求你聽我 ê 祈禱; 雅各 ê 上帝 ah, 求你 à<sup>n</sup> 耳孔來聽。[Sè-láh]9 做阮 ê 藤牌 ê 上帝 ah, 你 tiōh 看; 看你受抹油 ê ê 面。10 Tī 你 ê 殿院 toà 一日, khah 好一千日; 寧可 tī 我 ê 上帝 ê 曆顧門, Khah 好 tiām tī phái<sup>n</sup> 人 ê 布棚, 11 因爲耶和華上帝是日頭, 是藤牌; 耶和華賞賜恩惠 kap 榮光; 伊 bē-bat 留一項好物, 無 hō hiah-ê 行正直 ê 人。12 萬軍 ê 耶和華 ah, Oá 靠你 ê 人有福氣。

### 共同經課 - 3 以弗所書六章十節～二十節

10 結尾來講, lín tiōh tiām-tī 主 kap 伊氣力 ê 權能來勇壯。11 Tiōh 穿上帝全副 ê 戰甲, hō lín 能 khiā 在, 來抵敵魔鬼 chiah-ê 詭計。12 因爲咱 ê 交戰 m̄ 是抵敵血氣 ê, 就是抵敵 chiah-ê 辦正事 ê, chiah-ê 掌權 ê, kap chit-ê 暗世 chiah-ê 君王, 以及天中 phái<sup>n</sup> ê 神類。13 所以 lín tiōh 用上帝全副 ê 戰甲, hō lín tī 風險 ê 日抵擋能 tiāu, 到 lín 已經做成 lóng 總 ê 事, 也猶原 khiā 在。14 所以 tiōh khiā 起在, 用真實 hā 腰, 用義做護心鏡, 15 用和平福音 ê 備辦, 穿 tī 腳裡; 16 koh tiōh giā 信 ê 藤牌, 用 chit-ê chiah 會 phah 滅 phái<sup>n</sup>-ê 一切 ê 火箭。17 Koh 領受拯救 ê 頭盔, 以及神 ê 劍, 就是上帝 ê 話; 18 用 ták 樣 ê 祈禱 kap 懇求, 時時 tī 聖神來祈禱, 警醒 tī chit-ê, 爲 tiōh lóng 總 ê 聖徒懇求無厭倦; 19 也替我求, hō 我會得開嘴好膽來講, hō 人知福音 ê 奧妙, 爲 tiōh chit-ê 我做掛鐵鏈 ê 欽差; 20 也 tiōh 求 hō 我 tī chit-ê 奧妙會好膽, 照我所應該講 ê。

### 共同經課 - 4 約翰福音六章五十六節～六十九節

56 食我 ê 肉, lim 我 ê 血 ê 人, 伊 tiām-tī 我, 我亦 tiām-tī 伊。57 親像活 ê 父差我, koh 我 tūi 父來活; 食我 ê, beh tūi 我來活, 亦是 án-ni。58 這就是 tūi 天降落 ê 餅; m̄ 是親像列祖 ê 食 má-ná, 也死去; 食 chit-ê 餅 ê 人, beh 活到永世代。59 Chiah-ê 話是耶穌 tiām-tī 迦百農會堂來教示人 ê 時所講 ê。60 伊 ê 學生中 choē-choē 人聽了就講, Chit-ê 話真 oh; chī-chūi 會聽伊? 61 耶穌心內知伊 ê 學生因爲 chit-ê ngāuh-ngāuh 念, 就 kā in 講, chit-ê 是塞礙 tiōh lín mah? 62 設使 lín 看見人子上到伊原本 ê 所在裡? 63 hō 人活 ê 就是神: 肉體就無利益; 我所 kā lín 講 ê 話是神, 是活命。64 若是 lín 中間有 m̄ 信 ê 人 lah。因爲耶穌 tūi 起頭就知 chī-chūi m̄ 信伊, chī-chūi beh 賣伊。65 Koh 講, 因爲 án-ni, 我 bat kā lín 講, 若 m̄ 是 tūi 父 hō 伊, 無人會就近我。66 Tūi án-ni 伊 ê 學生 choē-choē 退去, 無 koh kap 伊行。67 耶穌就 kā 十二個學生講, Lín 亦 beh 去 mah? 68 西門彼得應伊講, 主 ah, 你有永活 ê 話, 阮 beh 去 chhē chī-chūi ah? 69 阮已經信, koh 知你是上帝 ê 聖 ê。